

فريق التفريغ بموقع الطريق إلى الله  
يقدم

## اليوم الثالث من "سلسلة الطريق إلى القرآن"

(باللهجة المصرية)

فضيلة الشيخ : الدكتور / حازم شومان

رابط المادة : <http://www.way2allah.com/modules.php?name=Khotab&op=Details&khid=114>



السلام عليكم ورحمة الله وبركاته

إن الحمد لله نحمده ونستعين به ونستغفره ، ونعوذ بالله من شرور أنفسنا ومن سيئات أعمالنا ، إنّه من يهده الله فلا مضل له ، ومن يضلل فلن تجد له هادياً مرشداً ، وصلاة وسلاماً على سيد الخلق أجمعين ، سيدنا محمد عليه أفضل الصلوات من رب العالمين إلى يوم الدين ، ثم أما بعد

فيعنى الواحد واحنا بنتكلم فى السلسلة دى يا جماعة ، الواحد بيفتكر أجمل أيام حياته والله ، أيام الكلية أيام ما كان الواحد يعنى إيه يعنى كل جهده على علاقتك بكتاب الله سبحانه وتعالى ، فالسلسلة دى مقصدها إن احنا نعيش المشاعر دى ، إن احنا نعيش أجمل أيام حياتنا مع كتاب الله سبحانه وتعالى ، إن احنا نعيش أعلى مشاعر ممكن أى إنسان يحسها فى حياته مع كتاب الله سبحانه وتعالى

عشان كدة رسول الله صلى الله عليه وسلم كان بيدعى ويقول : " اللهم إني أسألك ... أن تجعل القرآن العظيم " صحيح ، إيه ؟ " ربيع قلبى " يعنى إيه الربيع ؟ الربيع يا جماعة اللي هو المطر اللي بيتر من السما فتبتت به الأرض ، يعنى الرسول كأنه يقول يا رب خلى القرآن هو الماء اللي بيتر على قلبى فيحيا بيه قلبى ونور صدرى ، يارب خلى القرآن هو النور اللي بينور لى طريقي يبقى الرسول شبه القرآن بالماء وبالنور ، الماء اللي يتر على قلبك يحيا به قلبك ، والنور اللي يبقى قدامك فينور لك طريقك إلى الله سبحانه وتعالى ، عشان كدة ما فيش حاجة هتعيشك إيمانياً أد القرآن ، حتى السور المدنية اللي أحنا بدأين بالشرح فيها النهاردة ياذن الله سبحانه وتعالى

الجزء الثالث هندخل فى سورة آل عمران ياذن الله سبحانه وتعالى ، حتى السور المدنية يا جماعة مليانة معانى إيمانية هائلة لولا إن ما فيش وقت كنا وقفنا قدام كل سورة ، و أعطينا درس خاص فى التربية الإيمانية فى سورة البقرة ، التربية الإيمانية فى سورة آل عمران ، التربية الإيمانية فى سورة النساء ، ولكن احنا بنحاول ، مش ممكن إن أحنا هنقدر فى ساعة نفهم القرآن الكريم ، احنا بنحاول ندوق ولو دُقنا هُنْدَمِنْ علاقتنا بكتاب الله سبحانه وتعالى ، لو دُقنا فعلاً جمال القرآن مش هنسيبه بعد رمضان

أهم أهداف هذه السلسلة اللي مسميتها ياذن الله سبحانه وتعالى مدرسة القرآن ، ولكن ماهياش مدرسة كبيرة ولا حاجة دى احنا لسة فى كى جى ون كدة والا حاجة ، أو فى أولى ابتدائى حاجة لسة صغيرة كدة، ولكن آدى احنا دخلنا المدرسة إن شاء الله ، يعنى عما قريب نلاقى نفسنا إن شاء الله فى جامعة القرآن ياذن الله سبحانه وتعالى

فالسور المدنية يا جماعة فيها آيات إيمانية كثير جداً، خدوا بالكوا انتوا بتسمعوها فى صلاة التروايح فيها معانى إيمانية عالية جداً ، ربنا سبحانه وتعالى لم يدع التربية القلبية فى السور المدنية فى عز آيات الأحكام ، بل سورة زى سورة الزلزلة مكية ولا مدنية ؟ الزلزلة بتتكلم عن الزلزلة ويوم القيامة ، يبقى لازم تبقى مكية صح ؟ صح سورة الزلزلة سورة مدنية ، أنا بقول كدة ليه ؟ عشان اقولكم إن حتى فى عز الأحكام ربنا ما تركش التربية الإيمانية أبداً، وأنت

في عز التطبيق لتكاليف الدين وفي عز الدعوة ، وفي عز طلب العلم وفي عز الجهاد محتاج أنك دائماً يبقى قلبك مُتَّصِلٌ بالله من خلال العبادة ، ومن خلال الإيمانيات

**يعنى إيه الإسلام؟... عنوان ديننا**

هنبدأ الليلة النهاردة بإذن الله سبحانه وتعالى في سورة آل عمران ، ولكن مش هنسب سورة البقرة قبل ما نعقب تعقيب ختامى ومهم جدا، يا جماعة سورة البقرة بتتكلم عن إيه؟ الكلمة اللي بتجمع محور سورة البقرة هي إيه؟ جه الوقت اللي أحنا نتكلم في هذه النقطة ، وهي مسألة الإسلام لله ، الحاجة اللي كل العقوبات اللي تزلت في السورة بسبب غيابها وكل الفتوحات اللي تزلت في السورة بسبب وجودها هي الإسلام لله ، عنوان ديننا ده ، دينك مش اسمه الإنابة والا الاخلاص والا التقوى ، دينك اسمه الإسلام طب يعني إيه الإسلام؟ لما واحد يمسك مسدس في وش واحد كدة يقوله ارفع إيدك يرفع إيدته ، امشى قدامى يمشى قدامه ، اقعد يقعد ، يبقى ده اسمه إيه؟ استسلام يعني السمع والطاعة قهراً غصب عنك ، هتضرب بالنار لو ما سمعتش واطعت ، ولكن الإسلام أى السمع والطاعة ، طوعاً عن رغبة وعن حب وعن اقبال قلب على الله سبحانه وتعالى ، هو ده عنوان ديننا ، **عنوان ديننا أى السمع والطاعة لله ولكن بحب لله وياقبال قلب على الله سبحانه وتعالى** فده أخطر معنى في الدين

يا جماعة سورة البقرة بتتكلم عن الإسلام ، يعني قصة آدم اللي في أول السورة ربنا بيقول في آخرها " **قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَنْ تَبِعَ هُدَايَ** " البقرة: ٣٨ " **تَبِعَ** " يعني تبقى تابع ، تابع يعني تبعية ، دى كلمة التبعية دى في الدنيا كلمة وحشة جداً ، إنما مع الله هي الدين بتعنا إنك تبقى تابع للدين ، يبقى عندك تبعية ، يعني إيه تبعية؟ تبعية يعني امشى ورايا ، حاضر ، قُمت حودت يمين تحود ورايا ، حودت شمال تحود ورايا ، قعدت تقعد يعني بتقلدني من غير ما تفهم أنا بعمل إيه ، أهو هوا ده اللي ربنا طلبه مِنَّا في الدين ، إن أحنا نمشى ورا كلام ربنا و أوامر ربنا حتى لو مش فاهمين إحنا رايحين فين

ومرة طلب منَّا الإتياع في سورة طه " **فَمَنْ اتَّبَعَ هُدَايَ فَلَا يَضِلُّ وَلَا يَشْقَى** " طه: ١٢٣ الإتياع إنك تبقى ماشى ورايا ، بس فاهم أنا بعمل إيه ، فاهم حكمة أنا حودت ليه وأنا قعدت ليه وأنا رجعت ليه ، إنما التبعية ما انتش فاهم الحكمة ، فالتبعية هي الإسلام لله ، أنا من كتر ثققت فيك يا رب أنا سايب نفسى ليك

**وَمَا كَادُوا يَفْعَلُونَ**

بعد كدة في قصة بنى إسرائيل تعرضنا لقصة البقرة " **فَدَبَّحُوا بِهَا وَمَا كَادُوا يَفْعَلُونَ** " البقرة: ٧١ قمة العناد لأوامر ربنا سبحانه وتعالى ، يعني الأخ ده تقوله اشتغل في الدعوة يابنى ، اشتغل في الدعوة يا حبيبي ، اشتغل في الدعوة عشان خاطرى ، اشتغل في الدعوة عشان ربنا يجبك ، عما يشتغل في الدعوة يكون خلاص مثلاً في آخر شهر في الجامعة كدة ولا حاجة ، يكون هيسبب الجامعة خلاص بعد شهر " **وَمَا كَادُوا يَفْعَلُونَ** " اتبع سنة رسول الله يا أختي، اليسى الحجاب يا أختي لما تلبس الحجاب " **وَمَا كَادُوا يَفْعَلُونَ** " البقرة: ٧١

**أسلمت لك يارب**

بعد كدة تعرضنا لقول الله " **بَلَىٰ مَنْ أَسْلَمَ وَجْهَهُ لِلَّهِ وَهُوَ مُحْسِنٌ فَلَهُ أَجْرُهُ عِنْدَ رَبِّهِ وَلَا خَوْفٌ عَلَيْهِمْ وَلَا هُمْ يَحْزَنُونَ** " البقرة: ١١٢ " **أَسْلَمَ وَجْهَهُ** " يعني إيه؟ انت وشك ده هو اللي فيه سمعك وبصرك ، يعني أنا أسلمت

سمعى ليك يا رب ، وأسلمت بصرى ليك يا رب ، مداخل القلب كلها بقت في يدك يا رب ، وناصيتى اللى في وجهى اللى أنا بأقاد منها أسلمتها ليك يا رب ، قدنى إلى حيث تشاء ، يعنى أنا واثق فيك يا رب فخذ بناصيتى إلى ما تشاء " **مَنْ أَسْلَمَ وَجْهَهُ لِلَّهِ** " البقرة : ١١٢

بعد كدة دخلنا يا جماعة في قصة سيدنا إبراهيم إمام المسلمين جميعاً على مر العصور " **إِذْ قَالَ لَهُ رَبُّهُ أَسْلِمْ قَالَ أَسْلَمْتُ** " البقرة : ١٣١ فوراً إذ قال له ربُّه اشتغل في الدعوة اشتغلت ، قوم الليل قُمت ، البسى حجاب لبست ، اترك المعاصى ترك فوراً ، مافيش لحظة تردد " **قَالَ أَسْلَمْتُ لِرَبِّ الْعَالَمِينَ** " البقرة : ١٣١ بل " **وَوَصَّى بِهَا إِبْرَاهِيمُ بَنِيهِ وَيَعْقُوبُ يَا بَنِيَّ إِنَّ اللَّهَ اصْطَفَى لَكُمُ الدِّينَ فَلَا تَمُوتُنَّ إِلَّا وَأَنْتُمْ مُسْلِمُونَ** " البقرة : ١٣٢ هدف حياتك إنك تموت على الإسلام الكامل ، إنك تموت على التطبيق الكامل لأوامر ربنا ، فانت لازم كل يوم تقرب خطوة جديدة نحو الإسلام الكامل لله سبحانه وتعالى والسمع والطاعة لله " **سَمِعْنَا وَأَطَعْنَا** " متى سنطبقها ؟

بعد كدة جت آيات الأحكام بتاعتنا وفي أولها على طول كدة " **وَمَا جَعَلْنَا الْقِبْلَةَ الَّتِي كُنْتَ عَلَيْهَا إِلَّا لِنَعْلَمَ مَنْ يَتَّبِعُ** " البقرة : ١٤٣ نعرف مين اللى هيسلم ؟ مين اللى هيسمع ويطيع ؟ ومين اللى مش هيسمع ويطيع ؟ وكانت الخاتمة المشرفة بتاعت سورة البقرة في قول الله سبحانه وتعالى " **وَقَالُوا سَمِعْنَا وَأَطَعْنَا** " البقرة : ٢٨٥ عشان ربما يعرفنا في الآخر كدة إن سورة البقرة دى كلها موضوعها " **سَمِعْنَا وَأَطَعْنَا** " إنما احنا مش كدة يا جماعة للأسف الشديد سمعنا وأطعنا دى عندنا بتتحور شوية ، فيه بعضنا يقولك سمعنا ثم سمعنا ثم سمعنا ، وبعدين يا بنى ثم سمعنا وبعدين هطيع امتى ؟ هو قاعد يسمع وخالص ، سميع كبير على الفاضى كدة وفي واحد تانى " **سمعنا واستمعنا !!** " الله الله ، يا رب ، تلاقيه مشغل سورة يوسف كدة في كاسيت الميكروباص وماشى الصبح الله ، يا رب ، وهو مافيش أمر واحد في القرآن مطبقه في حياته سمعنا واستمعنا وفي واحد تانى زى بعض الشباب اللى قاعدين كدة " **سمعنا بس !!** " ...إيه ؟... يا بنى اشتغل في الدعوة ادعُ ، ادعُ إلى سبيل ربك ، بس أنا ماعنديش علم بس أنا مش عارف ، يا بنى من غير ما تبسبس سمعت الكلام روح طبق وربنا سبحانه وتعالى هيعينك وهيبعتلك الزاد ، ولما هتشتغل في الدعوة هتتشجع على طلب العلم ، وهتتشجع على العبادة وهتتشجع على الدين كله لأنك لا يمكن أنك تطلب من الناس حاجة أنت ما تعملهاش ، وأنت عارف أنك هتتزل تكلم أصحابك بكرة هتسهر الليلة تحضر الكلام اللى تقوله بكرة ، يبقى المقصد يا جماعة إن في " **سَمِعْنَا** " إيه ؟ بس ... بس إيه ؟ بس دى ... مش عايزين بس

وفي طائفة رابعة " **سمعنا وفهمنا !!** " الأول قبل ما أطيع لازم أفهم ، اقعنى بالحجاب الأول وأنا التحجب اقعنى بالأمر الفلان وأنا انفذه يبقى سمعنا وفهمنا

في طائفة خامسة " **سمعنا آه** ، أنا هسمع منك يا رب بس مش منك لوحده !! " أنا هسمع من القرآن وهسمع برضه ، زى لو تسمعوا عن روجيه جارودى ، روجيه جارودى لما أسلم فقرئتلة كلمة عجيبة جداً يعنى بيقول : " لقد أسلمتُ ولكن دون أن أتخلى عن قناعاتي السابقة " يا سلام يبقى انت لسه ما أسلمتص أصلاً ، الإسلام إنك على عتبة الباب كدة تقوم فاتح دماغك شاييل كل اللى فيها رمية في الزبالة ، فاتح قلبك شاييل كل اللى فيه رمية في

الزبالة ، شايل كل ماضيك ورميه في الزبالة ، وتقول يا رب أنا هبدأ صفحة جديدة مع الحياة كلها من خلال أوامرك وتوجيهاتك ووصاياك يا رب ، هو ده الإسلام ، إن خلاص ما فيش مرجعية في حياتك لتلقى الأوامر غير من الله ، ما فيش مرجعية في حياتك لتلقى المفاهيم غير من الله سبحانه وتعالى في ناس تانيين يا جماعة يقولك سمعنا أه أنا سمعت أهوه ، بس مصلحة الدعوة ! إن أنا ما عملش الموضوع ده " سمعنا بس يعني فقه الأولويات !! " لا مش فقه الأولويات انى اطبق الكلام ده ، سمعنا بس ايه ؟ فقه الواقع ، فقه الواقع ما ينفعش إن أنا أطبق ! يعني طبعا الكلام ده أنا ما بسخرش من حد من العاملين لدين الله ، وما بنكرش خطورة فقه الأولويات وفقه الدعوة، ما بنكرش خطورة الحاجات دى ، ولكن اللى بستنكره ان بعض الناس بيضع هذه المصطلحات أوثانا يتعبد لله بها من دون القرآن بقت أصنام فقه الواقع ، كذا يا بنى ربنا يقول كذا ، لا فقه الواقع كذا ، فقه الأولويات كذا ، يا بنى الله يقول كذا ، لا الأولويات كذا ، فإذا يا جماعة لا نضع أى مصطلح بينا وبين كلام الله سبحانه وتعالى ، النص نص فوق الجميع ، وفهم النص أه نطبق ، فهم النص فقه الواقع والأولويات ، ولكن ان احنا يبقى النص يقول كلام وأحنا عشان شايفين الواقع فيه حاجة تانية نعمل الحاجة التانية ما ينفعش ، فيعنى سمعنا

فيه " سمعنا وعصينا " دى طائفة احنا كلنا واقعين فيها للأسف الشديد ، ايه سمعنا وعصينا !!! فيه دعاء منسوب لسيدنا داوود ، يقال ان سيدنا داوود هو اللى قاله ، في القرآن يقول " **حَتَّىٰ إِذَا بَلَغَ أَشُدَّهُ وَبَلَغَ أَرْبَعِينَ سَنَةً قَالَ رَبِّ أَوْزِعْنِي أَنْ أَشْكُرَ نِعْمَتَكَ الَّتِي أَنْعَمْتَ عَلَيَّ وَعَلَىٰ وَالِدَيَّ وَأَنْ أَعْمَلَ صَالِحًا تَرْضَاهُ وَأَصْلِحْ لِي فِي ذُرِّيَّتِي** " الأحقاف: ١٥ اسمع " **إِنِّي ثَبْتُ إِلَيْكَ وَإِنِّي مِنَ الْمُسْلِمِينَ** " الأول قال أنا ثبت ، وبعد كدة قال أنا أسلمت ، طب ليه التوبة قبل الإسلام ؟ لأن الإسلام ان أنا بسمع وأطيع لله ، طب التوبة ؟ أنا بتوب من الذنوب ، الذنوب دى حاجة من اتنين يا سمعت واطعت لهوايا لما سولى المعصية ، يا سمعت واطعت للشيطان لما ازاغ قلبى تجاه المعصية يبقى كل معصية تقع فيها قبح في إسلامك لله ، كل معصية ضد كلمة مسلم ، كلمة مسلم عشان تكمل كدة لازم تبقى بعيدة عن المعاصى هي في المشرق وأنت في المغرب ، يبقى كلمة سمعنا وعصينا ماتلقش بناس مسلمين لله سبحانه وتعالى

أنا كنت عايز بس أعقب التعقيب الختامى ده على سورة البقرة يا جماعة ، إن سورة البقرة بتتكلم عن الإسلام لله فلازم يبقى ده شعارك أنا عبد ليك يا رب " اللهم إني عبدك وابن عبدك " أنا عبد وأبوي عبد وأمى أمة يعنى عبدة برضه ، يعنى ده أنا نسبى عريق في العبودية ليك يا رب ، أنا عبد ابن عبد ابن عبد لغاية الجد المليون ، أنا عبد ، فإنك أنت تعيش في إنك أنت عبد ، أنا يا رب هسمع وأطيع ، أنا مسلم ليك يا رب ، أنا هدف حياتى إن أنا أطبق كل أوامرك في حياتى يا رب ، الشعور ده يا جماعة هو ده اللى سورة البقرة تريد أن هي تزرعه في قلوبنا **سورة آل عمران**

هندخل على سورة آل عمران ياذن الله سبحانه ، آل عمران ليه تتسمى باسم آل عمران ؟ آل عمران دى اسرة صغيرة أوى ، يعنى ماهياش أسرة كبيرة كدة ، سيدنا إبراهيم وذريته أد ايه ، سيدنا نوح وذريته من بعده أجيال إد ايه ، ده آل عمران دول مين يا جماعة ؟ عمران ، سيدنا عمران ومراته ، امرأته خلفت مين ؟ مريم ، ومريم خلفت

مين؟ وفي التفاسير يقولك إن ده كانت بنتهم الوحيدة يعنى يقولك في أحد أقوال التفسير دى بنتهم لم ينجبوا غيرها أصلاً ، ومريم خلفت مين؟ عيسى، وبعد كدة خلاص لم يتزوج ولم يُنجب سيدنا عيسى ، يعنى هى أسرة مكونة من أب و أم خلفوا بنت ، خلفوا السيدة مريم رضى الله عنها ، وبعد كدة السيدة مريم أنجبت سيدنا عيسى بس

### لماذا سميت السورة بسورة آل عمران ؟

ومع ذلك ربنا حط اسمهم على سورة من أطول سور القرآن طب ليه يا جماعة ؟ لأن آل عمران حققوا مواصفات هى اللى السورة تريد أن تحققها فينا ، أول حاجة " **إِذْ قَالَتِ امْرَأَتُ عِمْرَانَ رَبِّ إِنِّي نَذَرْتُ لَكَ مَا فِي بَطْنِي** " آل عمران : ٣٥ ده ضناك ، ده ابنك ، ده اللى انتى قاعدة بقالك سنين مستنياه ، أعلى حاجة عندى ليك يا رب ، أعلى حاجة بملكها هى اللى هقدمها لك يا رب ، أنا مش بس أنا ليك وكمان الحاجات اللى غالية عندى فى حياتى ليك يا رب ، اللى هو يا جماعة الربانية فى معاملة الله ، **الاخلاص الكامل لله** ، مافيش حاجة فينا غير الله سبحانه وتعالى

### العقيدة والتوحيد

" **رَبِّ إِنِّي نَذَرْتُ لَكَ مَا فِي بَطْنِي مُحَرَّرًا** " آل عمران : ٣٥ يعنى إيه محرراً ؟ أصل الشهوات دى عبودية ، يعنى من سنتين كدة لما واحد زميلنا مات ، فدخلت الجامعة قلت بالتأكيد هيتعلق ورقة اشوف فيها العنوان بتاع العزى أروح أعزى فى ، فدخلت فى الكلية اللى مات فيها فلقيت الاعلان متعلق وأنا ببص لقيت البنات والأولاد تحت الإعلان قاعدين يجروا وده يخط فى دى ، ودى مش عارف تشد ذراع ده وده مش عارف يجرى ورا دى ، أنا قولت يا ربى هيا الناس دى مش زعلانة على صاحبها ، أنا موقن إن قلبها بيتقطع على صاحبها ، إمال بتعمل كدة ليه ؟ دمه ما بردش ، لسه جثته ما بردتش ، بتعمل كدة ليه ؟ عارفين ليه يا جماعة ؟ لأنه مُستعبد للشهوات ، مش قادر هوا هيموت من الحزن على صحبه ، بس مش قادر يسيب الشهوات والمعاصى عشان كدة الشهوات والمعاصى عبودية بتبقى مُستعبد ليها ، عشان كدة قالت " **رَبِّ إِنِّي نَذَرْتُ لَكَ مَا فِي بَطْنِي مُحَرَّرًا** " آل عمران : ٣٥ الحرية الكاملة ألا تكون عبداً إلا لله عشان كدة " **مُحَرَّرًا** " دى فى التفاسير قالوا يعنى خالصا مافيهوش حاجة لغير الله سبحانه وتعالى ، فدى هى الحرية الحقيقية يا جماعة " **فَتَقَبَّلَ مِنِّي** " آل عمران : ٣٥ تقبل منى ، انت بتقدمى لربنا أعلى حاجة عندك فى حياتك ، وكمان بتقولى بس يا رب انت ترضى ، بس يا رب انت تقبل

تخيلوا يا جماعة انت بتقدم لربنا كل حياتك وكل طاقتك وكل الحاجات اللى أنت تملكها ، وفى الآخر بتقول بس يا رب انت ترضى عنى يا رب ، شايفين الإيمانيات دى ؟ عرفتموا ليه السورة اتسمت باسمائهم ؟ **لأن أول حاجة دول رمز لليقين والعقيدة والتوحيد ، تانى حاجة رمز للتضحية** ، إن امرأة عمران ضحت بضناها الوحيد عشان ربنا سبحانه وتعالى بعد ما ضحت بنفسها عشان ربنا ، وسورة آل عمران بتطلب منا كلنا إن احنا نضحى ليه ؟ هنقول دلوقتى ، **تالت حاجة إن هما قدوة فى الربانية ، فى معاملة الله سبحانه وتعالى** ، المشاعر الربانية الجميلة اللى أحنا بنسمعها دى ، بعد كدة سيدنا عيسى لما جه نبى اشتغل فى الدعوة عليه الصلاة والسلام ، يبقى قدوة فى الدعوة إلى الله ، وهما دول الحاجات اللى آل عمران بتطلبها منا، عشان كدة اسم السورة ده هو ده حكمته والله أعلم



**ليه آل عمران جت بعد البقرة ؟**

طب يا جماعة آل عمران جت بعد البقرة ليه ؟ سورة البقرة احنا قعدنا نتكلم إزاي نبني ؟ إزاي نبني المجتمع ؟ عايزين نبني والتشريعات تيجي والعبادات تيجي ، القبلة تتحول ، قاعدين نبني واحنا بنبي قعدنا نتكلم أد إيه الدين ده عظيم ، وأد إيه اللي يشوف الدين ده بالعظمة بتاعته هينبهر ، وأد إيه اللي هيطلع على الإسلام ومفاهيم الإسلام هينبهر بالإسلام ، انت فكرك إن أمريكا وإسرائيل وأوروبا وأعداء الدين هيسيونا نبني الدين ده عشان الناس كلها تشوفه ، عشان الناس تدخل في الإسلام ؟ لايمكن طبعا ، أكثر الناس دي لايمكن تسيينا نبني يا جماعة ، هتقف في وشنا حتى لايرتفع البناء ، حتى لا تظهر سورة الدين العظيمة ، فتيجي آل عمران اللي هي كله جاي هاجم على هذا البناء عشان يهدمه ، عشان تقولك إن هما مش هيسيونا في حالنا ، مدام هنعمل لدين الله لازم هتلاقى أهل باطل في وشك

**سورة البقرة بتتكلم عن كيف يبني الإسلام وآل عمران بتتكلم عن كيف لأيهدم الإسلام** ، يبقى الاتنين موضعهم متكامل عشان كده كان رسول الله صلى الله عليه وسلم بيأمر على السرية اللي حافظ البقرة وآل عمران ، لأن اللي فاهم البقرة وآل عمران يا جماعة ، طبعا الصحابة كانوا حافظين عن فهم ، لأن الأحداث دي تنزلت أصلاً عليهم ، اللي فاهم البقرة وآل عمران يا جماعة ده يحكم دولة ، ده ممكن يحكم مجتمع ، يعني لو وديناه موزمبيق دلوقتي يحكم موزمبيق ، بعد خمس سنين هتلاقى موزمبيق من الدول الصناعية الكبرى ليه ؟ لأن هو فاهم إزاي يبني الدولة ، وإزاي يحمي الدولة من الهدم بعد ما تبنى هذه الدولة

سورة آل عمران إذا بتكلمنا عن أن الواقع كله هيهجم علينا ، إن كل واحد على غير الإسلام هيحاول أنه يهدم هذا البناء بأى طريقة ، عشان كده سورة آل عمران كلها حرب من أولها ، جو الحرب الهائلة على الإسلام ، حرب شبهات وحرب جدال ، وحرب نفاق وحرب سيف ، والمشركين جاينين في غزوة أحد مجتمعين قوتهم عشان يجوا يجاربونا ، قال عمران بتقولك إنك هتتحارب من الجميع ، وإن لما الدين يتحارب لازم يبقى في رجالة

**مقدمة آل عمران**

بتبدأ آل عمران بمقدمة مكونة من ١٨ آيه من أول آية واحدا لغاية آية ١٨ من أول " **الم \* اللَّهُ لَا إِلَهَ إِلَّا هُوَ الْحَيُّ الْقَيُّومُ** " آل عمران ١ : ٢ لحد قول الله " **شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ قَانِمًا بِالْقِسْطِ** " آل عمران ١٨ ) دي المقدمة ١٨ آية ، انتوا حضرتوا الجزء ولا لأ ؟ حضرتوه ولا لأ ؟ يعني ماشي ، الله المستعان فاللي هيجي محضر يا جماعة هيفرق معاه والله جدا يا جماعة ، اللي هيجي محضر هيستفاد تلت أربع أضعاف اللي هيجي مش محضر الجزء

قال عمران بدأت بمقدمة مكونة من ١٨ آية المقدمة دي عبارة عن إيه ؟ " **الم \* اللَّهُ لَا إِلَهَ إِلَّا هُوَ الْحَيُّ الْقَيُّومُ** " آل عمران ١ : ٢ " **الم** " الحروف المقطعة ، احنا اتكلمنا في سورة البقرة قلنا دي بتدل على الثقة في الله ، يعني الحروف المقطعة عبارة عن ثناء على الله ، وثناء على القرآن ليه ؟ ثناء على الله : إن من الحروف دي قال هذا القرآن العظيم وثناء على القرآن ، القرآن العظيم اللي تكون من هذه الحروف ، عشان كده بعض الحروف المقطعة في السور بتاعت القرآن تلاقى بعدها يا ثناء على القرآن زي سورة البقرة " **الم \* ذَلِكَ الْكِتَابُ لَا رَيْبَ فِيهِ** "

البقرة ٢: ١ يا ثناء على الله زى آل عمران " **الم \* اللَّهُ لَا إِلَهَ إِلَّا هُوَ الْحَيُّ الْقَيُّومُ** " آل عمران ١ : ٢ بتبدأ بالثناء على الله

ثم بعد كدة أول عدو يبحارب في الدين ، أول نوع من أعداء الدين ، سورة آل عمران المقدمة بتاعتها بتجمل الأعداء بتوع الدين قبل ما بتفصل مواجهمهم ، أول عدو يبحارب في الدين

" **إِنَّ اللَّهَ لَا يَخْفَى عَلَيْهِ شَيْءٌ فِي الْأَرْضِ وَلَا فِي السَّمَاءِ** " آل عمران : ٥ ربنا بيكلم مين ؟ بيكلم ناس بيشتغلوا في الدرى ، بيشتغلوا من غير ما حد يشوفهم كأنه بيقوهم أو عوا تفتكروا أن ربنا يخفى عليه شىء

" **هُوَ الَّذِي يُصَوِّرُكُمْ فِي الْأَرْحَامِ كَيْفَ يَشَاءُ** " آل عمران : ٦ دى اللى في الأرحام ، اللى ماحدش شايف اللى جوه الله يعلم اللى جوه " **هُوَ الَّذِي يُصَوِّرُكُمْ** " لما أنتوا مكنتوش تعرفوا حاجة خالص ، و أنتوا في أرحام أمهاتكوا

حرب الشبهات

" **لَا إِلَهَ إِلَّا هُوَ الْعَزِيزُ الْحَكِيمُ \* هُوَ الَّذِي أَنْزَلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ**

**مُتَشَابِهَاتٌ** " آل عمران ٦ : ٧ فيه آيات أهل الزيغ والشبهات ما يعرفوش إن هما يتكلموا فيها ، آيات مُحكمة

المعنى لا تحمل تأويلين ، وفيه آيات تحمل تأويلين يعنى إيه تحمل تأويلين ؟ يعنى ممكن الآية تمشى كدة وممكن تمشى كدة ، ولا يُحكّمها إلا الراسخين في العلم اللى فاهمين القرآن " **وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ**

**مَا تَشَابَهَ** " آل عمران : ٧ يبقى أول أعداء يبحاربوا الدين حرب الشبهات اللى بيستغلوا الآيات اللى هى ممكن

تحمّل وجهين في التأويل ، ويبدأ يقولك إيه ويبدأ يضرب هنا ، طبعاً الكلام ده يعنى له تفصيل ياذن الله سبحانه

وتعالى ، ويبدأ يضرب هنا عشان يثير الشبهات يبقى أول أعداء في الدين الذين يُثيرون الشبهات " **هُوَ الَّذِي أَنْزَلَ**

**عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ مَا تَشَابَهَ مِنْهُ**

" آل عمران : ٧ ليه ؟ " **ابْتِغَاءَ الْفِتْنَةِ** " عايزين يضيعوا يقين الشباب وعقيدة الشباب

" **وَابْتِغَاءَ تَأْوِيلِهِ وَمَا يَعْلَمُ تَأْوِيلَهُ إِلَّا اللَّهُ وَالرَّاسِخُونَ فِي الْعِلْمِ** " آل عمران : ٧ يبقى احنا عايزين الرسوخ في العلم

" **يَقُولُونَ ءَأَمَّنَّا بِهِ كُلٌّ مِنْ عِنْدِ رَبِّنَا** " آل عمران : ٧ أصل أنا لما ألقى آية فيها اعجاز علمى في القرآن ، وبعد

كدة آيه تانية أنا مش فاهم معناها هقول مادام دى من عند الله يبقى دى من عند الله ، يبقى الآيات اللى أنت

فهمتها ويقينك زاد بيها ، تثبت يقينك في الآيات اللى أنت مش فاهمها " **كُلٌّ مِنْ عِنْدِ رَبِّنَا وَمَا يَذَّكَّرُ إِلَّا أُولُو**

**الْأَلْبَابِ** " آل عمران : ٧ أولوا الأبواب دول بيقولوا إيه ؟ " **رَبَّنَا لَا تُزِغْ قُلُوبَنَا** " آل عمران : ٨ يا رب أهل الزيغ

دول يا رب ، احفظ قلوبنا أن قلوبنا تزيع " **بَعْدَ إِذْ هَدَيْتَنَا وَهَبْ لَنَا مِنْ لَدُنْكَ رَحْمَةً إِنَّكَ أَنْتَ أَلْوَهَّابُ** "

آل عمران : ٨ أول طائفة حرب الشبهات

حرب السيف

الطائفة الثانية " **إِنَّ الَّذِينَ كَفَرُوا لَنْ نُغْنِيَ عَنْهُمْ أَمْوَالُهُمْ وَلَا أَوْلَادُهُمْ مِنَ اللَّهِ شَيْئًا وَأُولَئِكَ هُمْ وَقُودُ النَّارِ \* كَذَّابِ**

**آلِ فِرْعَوْنَ وَالَّذِينَ مِنْ قَبْلِهِمْ** " آل عمران ١٠ : ١١ اللى جرى ورا موسى ، عايزين يدجوا بنى إسرائيل ، دخلنا في

حرب السيف ، الطائفة الثانية حرب السيف " **قُلْ لِلَّذِينَ كَفَرُوا سَتُغْلَبُونَ وَتُحْشَرُونَ إِلَىٰ جَهَنَّمَ وَبِئْسَ الْمِهَادُ** " آل

عمران ١٢ هتتهزموا هتتهزموا في معركة السيف ، اليقين في الله " **قَدْ كَانَ لَكُمْ آيَةٌ فِي فِتْنَةِ النَّعْتَانِ** "

آل عمران : ١٣ حق وباطل " **فِنَّةٌ تُقَاتِلُ فِي سَبِيلِ اللَّهِ** " آل عمران : ١٣ ربنا يجعلنا منهم يا رب ، من رافعى راية الحق اللهم آمين " **وَأُخْرَى كَافِرَةٌ** " آل عمران : ١٣ الكافرة بقى " **يَرَوْنَهُمْ مِثْلَيْهِمْ رَأْيَ الْعَيْنِ** " آل عمران ١٣ يعنى احنا نطلع نحارب اليهود دلوقتى ، احنا مثلاً عشرة اليهود يشوفونا عشرين تلتين أربعين ليه ؟ فى سورة الأنفال ربنا قال " **وَيَقُلُّكُمْ فِي أَعْيُنِهِمْ** " الأنفال ٤٤ يعنى ربنا كأنه قال للمؤمنين إن أنا قلتكوا فى عين المشركين إنما هنا فى آل عمران كأنه قال أنا زودت أهل الحق فى عين الكافرين ، هو يا رب المفروض إن احنا يعنى يشوفونا أكثر من حجمنا ؟ ولا يشوفونا أقل من حجمنا ؟

نصرة الله أحياناً بتستوجب ده ، وأحياناً بتستوجب ده ، يعنى لما يكون أهل الحق ضعفاء قلة يبقى مطلوب إن أهل الباطل يشوفوهم قليلين ، عارفين ليه يا جماعة ؟ عشان يستهينوا بيهم أوى فيدخلوا المعركة ، وهما يعنى مرخين خالص ، وأهل الحق طبعاً قمة الحماس يدخلوا يطيروهم زى بدر إنما لما يكون أهل الحق كثير فلو شافونا كمان أكثر وأقوى يقوموا من قبل ما يدخلوا المعركة يجيلهم إحباط قاتل ، يدخلوا المعركة وهما محبتين نقوم نظيرهم فيها برضوا ، فلما يكون أهل الحق قلة مصلحة ، أهل الحق أنهم يتشافوا أضعف وأضعف ، لما يكونوا أهل الحق قوة وكثرة ودولة يبقى مصلحة أهل الحق إن هما يتشافوا أضعاف ليه ؟ عشان يجيبوا إحباط لأهل الباطل فيخزل عنهم " **يَرَوْنَهُمْ مِثْلَيْهِمْ رَأْيَ الْعَيْنِ وَاللَّهُ يُؤَيِّدُ بِنَصَرِهِ مَنْ يَشَاءُ إِنَّ فِي ذَلِكَ لَعِبْرَةً لِّأُولِي الْأَبْصَارِ** " آل عمران ١٣ يبقى أول حاجة حرب الشُّبُهَات ، بعد كدة حرب السيف

#### ضعفاء الإيمان

العدو الثالث هى دى المصيبة " **زَيْنَ لِلنَّاسِ حُبُّ الشَّهَوَاتِ مِنَ النِّسَاءِ** " آل عمران : ١٤ ضعفاء الإيمان ، إحنا ، يا جماعة المشكلة الثالثة اللى بيواجهها الدين وربنا بيقوها فى أول السورة ضعفاء الإيمان ، اللى زُين ليهم حب الشهوات من النساء ، اللى كل قضيته بنت ، وكل قضيته يلف بالعربية بتاعته أو بتاعته صحبه عشان يعاكس البنات " **وَالْبَيْنِ** " آل عمران : ١٤ أنا عايز أتجوز عشان أخلف كثير " **وَالْقَنَاطِيرِ الْمُقَنْطَرَةِ مِنَ الذَّهَبِ وَالْفِضَّةِ** " آل عمران : ١٤ شاب بيقولى بس احنا نعمل المليون الأولانى ، بعد كدة هتبقى سهلة إن شاء الله ، عايز فلوس كل أحلامه دلوقتى فلوس " **وَالْخَيْلِ الْمُسَوَّمَةِ وَالْأَنْعَامِ وَالْحَرْثِ ذَلِكَ مَتَاعُ الْحَيَاةِ الدُّنْيَا** " آل عمران : ١٤ ضعفاء الصف اللى أهل الشُّبُهَاتِ وأهل السيف ما انتصروش على هذه الأمة غير بسبب ضعفاء الصف ، إحنا الثغرة اللى نُفِذَ لَدِينَا مِنْهَا " **زَيْنَ لِلنَّاسِ حُبُّ الشَّهَوَاتِ** "

فى قول تانى لله سبحانه وتعالى فى سورة الحجرات خدوا بالكوا يا جماعة " **وَلَكِنَّ اللَّهَ حَبَّبَ إِلَيْكُمُ الْإِيمَانَ وَزَيَّنَهُ فِي قُلُوبِكُمْ** " الحجرات : ٧ ففى ناس زُينت الشهوات فى قلوبها ، وفى ناس زُين الإيمان والطاعة فى قلوبها ، عايزين

إحنا نبقى من الصنف التانى

" **زَيْنَ لِلنَّاسِ حُبُّ الشَّهَوَاتِ مِنَ النِّسَاءِ** " آل عمران : ١٤ فاكرين حديث الثلاثة والصخرة ؟ الراجل التانى اللى كانت له بنت عم ضحى بشهوة النساء عشان ربنا ، والراجل الأولانى اللى هو كان بيبر أمه وأبوه وولاده البنين بتوعه قاعدين يشدوا فى رجليه عايزين يكلوا ، ضحى بشهوة البنين عشان ربنا عشان بر الوالدين ، والراجل الثالث الفلوس والأنعام والحيل اللى نَمَّاهَا لِلأَجِيرِ اللى مشى وماخدش أجره ، وبعد كدة الأجير جه خد الفلوس والحيل



والأنعام دى كلها ، ضحى بالأموال والأنعام عشان ربنا ، يبقى حديث التلاته والصخرة بيقولك انك تضحى بكل دول عشان ربنا سبحانه وتعالى

### علاج حب الدنيا

الآية اللي بعدها ، اللي بعد حب الدنيا ؟ " **قُلْ أُوْبِيْكُمْ بِخَيْرٍ مِّنْ ذَلِكُمْ لِلدِّينِ اتَّقُواْ عِنْدَ رَبِّهِمْ جَنَاتٌ تَجْرِيْ مِنْ تَحْتِهَا الْأَنْهَارُ خَالِدِينَ فِيهَا وَأَزْوَاجٌ مُّطَهَّرَةٌ وَرِضْوَانٌ مِّنَ اللّهِ** " آل عمران: ١٥ ربنا سبحانه وتعالى وضع آية حب الدنيا قبلها حرب الشُّبُهَات وحرب السيف ، اللي هو هم الدين ، وبعدها آية الجنة ، كأن حب الدنيا علاجه إنه يتحط ما بين هم الدين وهم الجنة ، أو حب الجنة تبقى مطرقة من ناحيتين تطحن حب الدنيا في القلب ، يعنى عايز تعالج حب الدنيا في قلبك ؟

**كل ما هم الدين يزيد في قلبك وحب الجنة والشوق للجنة يزيد في قلبك ، كل ما حب الدنيا يطحن في قلبك**

عشان كدة ربنا جاب دى ما بين دول ، عشان كأنه يقولك هما دول العلاج ، طب يا رب إذا التلت أنواع اللي هما خطر على الدين يا جماعة أهل الشُّبُهَات ثم أهل السيف ، حرب السيف بعد حرب الشُّبُهَات ، ثم أهل حب الدنيا يا رب أنت تُريد مننا إيه ؟ أنت تُريد مننا إيه ؟

" **وَاللّهُ بِصِيْرٍ بِالْعِبَادِ \* الَّذِينَ يَقُولُونَ رَبَّنَا** " آل عمران ١٥: ١٦ دي الصورة اللي عايزين نوصلها " **الَّذِينَ يَقُولُونَ**

**رَبَّنَا إِنَّا أَمْنَا فَاغْفِرْ لَنَا ذُنُوبَنَا وَقِنَا عَذَابَ النَّارِ** " آل عمران ١٦ خمس صفات اتوصفنا بيها " **الصَّابِرِينَ وَالصَّادِقِينَ**

**وَالْقَانِتِينَ وَالْمُنْفِقِينَ وَالْمُسْتَغْفِرِينَ بِالْأَسْحَارِ** " آل عمران : ١٧ الصبر والصدق أول صفتين ، لما الدين يتحارب أول

حاجة لازم صبر ليه ؟ ما أنت دلوقتي هيلتزم على ايدك شاب ، ده لسه كمان فيه خمسين ألف شاب ما التزموش ،

وأما يلتزم على أيدك دول ، لسه فيه ألف بلد ما التزمتمش ، وأما يلتزم على أيدك دول دى ، لسه العالم كله على

الكفر ، عايزة صبر وعايزة صدق ، لأنك لازم تضحى عشان دينك ، وما يقدرش يضحى عشان دينه غير الصادق

طيب يا رب عشان اقدر أصبر و أصدق " **الصَّابِرِينَ وَالصَّادِقِينَ وَالْقَانِتِينَ** " آل عمران : ١٧ أهل قيام الليل

" **وَالْمُنْفِقِينَ** " آل عمران : ١٧ اللي بيطلعوا لله ، ويبشتغلوا في صنائع المعروف " **وَالْمُسْتَغْفِرِينَ بِالْأَسْحَارِ** "

آل عمران: ١٧ اللي هوا بعد قيام الليل يستغفر ربنا ، فلا تزيد العباداة إلا انكسار على انكسار ، كأن ربنا بيقولك

أن زاد الصبر والصدق هو العباداة ، فكل ما تعبد ربنا أكثر كل ما الصبر والصدق يزيدوا أكثر

" **شَهِدَ اللّهُ أَنَّهُ لَا إِلَهَ إِلَّا هُوَ** " آل عمران : ١٨ آخر آية في المقدمة " **وَالْمَلَائِكَةُ وَأُولُوا الْعِلْمِ .... لَا إِلَهَ إِلَّا هُوَ**

" آل عمران : ١٨ زى أول آية زى أول القرآن " **الم \* اللّهُ لَا إِلَهَ إِلَّا هُوَ** " آل عمران ١ : ٢ أول آل عمران

" **قَاتِمًا بِالْفِئْطِ** " آل عمران: ١٨ " **الْحَيِّ الْقَيُّومُ** " آل عمران : ٢ يبقى ربنا بدأ المقدمة بما ختم به المقدمة ، نفس

الصفتين لله سبحانه وتعالى ، طب ربنا بيقول " **شَهِدَ اللّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ** " آل عمران :

١٨ يعنى ربنا كأنه بيقولنا اثبتوا ، ربنا يبشبتنا ليه ؟

### تضحيات المسلمون الأوائل

يا جماعة انتوا عارفين الصحابة داقوا إيه عشان الدين ده يُقام ؟ لما يبجي تدبر في القرآن المدنى تحس إن الصحابة فعلاً

اتبهدلوا بجدلة هائلة عشان الدين ده يُقام ، يعنى دلوقتي تلاقى الصحابة في أول مكة تعذيب مهول ، يخرجوا من

تعذيب أول مكة يدخلوا في شعب أبي طالب تلت سنين ، مش لاقين ياكلوا ، يخرجوا من شعب أبي طالب يدخلوا في مرحلة آخر مكة ، الحرب الهائلة من جزيرة العرب كلها عليهم والحرب الإعلامية عليهم ، يخرجوا من آخر مكة يطلب منهم الهجرة وترك الوطن وترك الأحباب وترك الأهل ، يروحوا يهاجروا يلاقوا العرب كلها بترميمهم عن قوس واحدة ، كل شوية المشركين جايين جيوش وجايين لهم كل شوية ، المشركين جايين جيوش وجايين لهم يخلصوا من المشركين يطلعهم مشكلة الروم والفرس ، ما هما بقوا قوة كبيرة لدرجة إن سيدنا عمر بن الخطاب كان يبقى نام فواحد صحابي يروح يخبط عليه في نص الليل ، الصحابي يقولك ففزع عمر وقام وقال: " **أهجمت الروم؟** " هيا الروم هجمت علينا؟

يعنى يا جماعة الصحابة كانوا عايشين مهديين في أى لحظة بأى هجوم ، ممكن اليهود يهجموا في أى لحظة ، ممكن النصارى يهجموا في أى لحظة ، ممكن المنافقين يعملوا أى حاجة في أى وقت ، ممكن المشركين يجيوا جيش في أى لحظة ، ممكن الفرس أو الروم يهاجموا في أى لحظة

احنا في سورة البقرة متين ستة وثمانين آية تحس إن انت روحك بتطلع من كتر المشاكل الموجودة في السورة ، تخلص السورة تيجي تستريح تلاقى آل عمران المفروض استريحنا ، مشاكل جديدة وهموم جديدة وابتلاءات جديدة ومعوقات جديدة ، تخلص آل عمران متين آية يا رب خلاص استريحنا وخلصنا ، تلاقى سورة النساء مشاكل جديدة ومعوقات جديدة وابتلاءات جديدة

فطول ما أنت ماشى لو أنت فاهم الآيات هتتحس فعلاً الصحابة ضحوا أد إيه عشان الدين ده يُقام ، وكان الدافعين اللى بيخلوهم يضحوا عشان الدين يُقام ، الجنة وهم الدين ، أهوه الاتنين دول الجنة وهم الدين ، الجنة اللى بسبب الجنة الصحابة تحولوا إلى استشهاديين ، يعنى يعملوا عمليات استشهادية عشان الجنة

البراء بن مالك لما قاهم ارفعونى على أسنة الرماح وارموني من فوق باب الحصن عشان أفتحولكوا من جوه ، طب ما انت كدة هتقطع حنت اتقطع حنت دى عملية استشهادية يا جماعة ، عشان ربنا وعشان الدين عشان الجنة وفي نفس الوقت تلاقى سيدنا سعد بن خيثمة أبوه عايز يُخرج فيقولوا أخرج أنا الغزوة دى وأنت تقعد قال له : " **يا أبت لو كان غير الجنة لآثرئك** " لو كانت أى حاجة غير الجنة كان على راسى من فوق إنما الجنة لأ ، لا أعرف أبويا ولا أعرف أخويا دى الجنة

لا تقولى والدى مش عايزنى آجى أصلى ، والا والدى مش عايزنى آجى مش عارف أعمل إيه ؟ والا مش عايزنى أصحاب المنتزمين والا والدتى مش عايزانى ألبس نقاب ، دى الجنة يا جماعة ، **لو كان غير الجنة - تقول لأبوك كدة - لأطعتك و لكنها الجنة** ، عشان هم الدين ده ، عشان الجنة عملوا ده ، عشان هم الدين سيدنا عبد الله بن رواحة لما جه يأكل حنة لحمة يتقوى بيها على الجهاد في غزوة مؤتة فسمع حطمة في جيش المسلمين يعنى كركبة يعنى في هجمة جاية على جيش المسلمين فقال: " **وأنت في الدنيا** " وأنت في الدنيا المسلمين يتحاربوا وتركها وانطلق وجاهد حتى استشهد في سبيل الله

وأنت في الدنيا أنت تقول كدة ، وأنت في الدنيا فلسطين تضيع ، وأنت في الدنيا المسلمات يُغتصبوا ، وأنت في الدنيا يجيوا المرأة الحامل يفتحوا بطنها يرموا الجنين ويحطوا قطة في بطنها ويحيطوا بطنها عليها يبقى الجنين مات ،

وأمة ماتت وأنت في الدنيا يحصل كده !! وأنت في الدنيا ، فكان هم الدين والشوق الهائل إلى الجنة هما دول اللي مثبتين الصحابة في هذا الواقع ، عشان كدة الحاجتين دول هما أكثر حاجتين لازم ندعمهم في قلوبنا

### حرب الشبهات

بتخلص المقدمة ١٨ آية ، يبدأ التفصيل ، شوط طويل جداً من أول آية ١٩ لغاية آية ١٢٠ ، حرب الشبهات ، مواجهة حرب الشبهات من أول قول الله " **إِنَّ الدِّينَ عِنْدَ اللَّهِ الْإِسْلَامُ** " آل عمران : ١٩ مواجهة اليهود والنصارى من أول " **إِنَّ الدِّينَ عِنْدَ اللَّهِ الْإِسْلَامُ** " لغاية " **إِنْ تَمَسَسْتُمْ حَسَنَةً تَسْؤُهُمْ وَإِنْ تُصِيبْكُمْ سَيِّئَةٌ يَفْرَحُوا بِهَا** " آل عمران : ١٢٠ يبقى إذا الشوط ده كله شوط الرد على الشبهات وإدارة المعركة الفكرية ، إدارة حرب الشبهات

### حرب السيف

من أول ١٢١ ل ١٨٠ ستين آية عن غزوة أحد ، اللي هيا حرب السيف ، حرب السيف خدت ستين آية ، اللي هيفهم آيات غزوة أحد ده يعنى فعلاً يا جماعة من أخطر آيات القرآن على الإطلاق ، ومن أشد آيات القرآن اللي بتزلزل القلب لما تُقرأ ، والله الواحد فعلاً يظن إن لو كنا انتصرنا في أحد والستين آية دي ما نزلتس كنا احنا الخسرانيين ، الحمد لله إن احنا ما كسيناش في أحد والستين آية دول نزلوا ، لأن كمية المعاني اللي فيهم والمفاهيم اللي فيهم والإيمانيات اللي فيهم أخطر من أى حاجة ، أخطر من أى حاجة نخسرها في سبيل إن الآيات دي تتزل

### مجادلة اليهود ثم الخاتمة

وبعد ما تخلص الستين آية بتوع حرب السيف خلاص الخاتمة ، لأ ترجع قمن آيات تاني من أول آية ١٨١ لغاية آية ١٨٩ من أول " **لَقَدْ سَمِعَ اللَّهُ قَوْلَ الَّذِينَ قَالُوا إِنَّ اللَّهَ فَقِيرٌ وَنَحْنُ أَغْنِيَاءُ** " آل عمران : ١٨١ مجادلة اليهود مرة أخرى ، مجادلة أهل الكتاب مرة أخرى ، لغاية ما قبل الشوط الختامي اللي هو قول الله سبحانه وتعالى " **إِنَّ فِي خَلْقِ السَّمَوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لآيَاتٍ لِّأُولِي الْأَلْبَابِ** " آل عمران : ١٩٠ دي بداية الخاتمة ، الصورة المشرقة بتاعة الناس اللي بيتوجهوا لله بالدعاء ، وبيتوجهوا لله بالعمل ، عشان ربنا كأنه يقولنا الصورة بتاعة الخاتمة دي الصورة اللي أنا أريد أنكو انتوا تحقوها آخر آية في آل عمران بتلملنا آل عمران كلها

" **يَا أَيُّهَا الَّذِينَ آمَنُوا** " آل عمران : ٢٠٠ نعم يا رب " **اصْبِرُوا وَصَابِرُوا وَرَابِطُوا وَاتَّقُوا اللَّهَ لَعَلَّكُمْ تُفْلِحُونَ** "

آل عمران : ٢٠٠ الآية دي تحسسك أن احنا كنا في آتون ، في فرن ، في معركة ، في معمة ، ربنا بيقولك اصبر

طب يا رب الصبر هينفد ، صابر واستحمل وشد على نفسك واربط على قلبك ياذني عشان تستحمل ، **ورابط**

**الرابط هنا كان هو المكث في بيوت الله للعبادة عشان المعونة** ، زى ما الرسول عليه الصلاة والسلام فصل هذا

عشان المعونة التعبدية على مهام الجهاد والصبر والصدق ، الترتيبية الإجمالية دي نخرج منها بيايه ؟ يعنى الترتيبية دي

مممكن ذهنك يجي في إيه وأنا بقول الكلام ده ، إن أول حاجة في المقدمة ربنا جاب حرب الشبهات قبل ما يجيب

حرب السيف صح ولا لا ، وبعد كدة آيات حرب الشبهات خدت في السورة ١٢٠ آية ، آيات أحد خدت ٦٠

آية ، يعنى آيات حرب الشبهات خدت ضعف حرب السيف ، وبعد كدة ربنا جاب ال ١٢٠ آية بتوع الشبهات

أو ١٠٠ منهم قبل ما يجيب آيات أحد ، قبل ما يجيب آيات السيف ، يعني كأن ربنا يقولك إيه أن حرب الشُّبُهَات  
أخطر من حرب السيف

### حرب العقيدة والحرب الفكرية

حرب العقيدة دي أخطر من حرب السيف يا جماعة ، الحرب الفكرية اللي أمريكا بتعملها من خلال العلمانية ، من خلال الاستشراق ، من خلال الفرقان اللي متزليه ، من خلال القنوات اللي قاعدة تبث شهوات ضد الشباب ، من خلال الكلام ده أثره أخطر مليون مرة من إن هما يتزلوا يضربونا بالقنابل ، لأن القنابل مش هتعمل فينا حاجة واحنا مع الله وعقيدتنا ثابتة

يبقى لازم نفهم يا جماعة خطورة المعركة الفكرية ، طب ليه يعني بنقول الكلام ده ليه ؟ عشان نفهم احنا محتاجين نفهم ديننا ، محتاجين إن احنا فاهمين ديننا ، ما هو السيف ده اللي العضلات بتاعته أقوى طبعاً بعد نصره الله هيكسب فيه إن شاء الله ، إنما الحرب الفكرية لأ ، بل حرب السيف حتى لو ما عندك عضلات وتوجهت إلى الله تكسب فيها ، إنما الحرب الفكرية دي البقاء فيها للأفهم اللي فاهم أكثر ، اللي فاهم عقيدته أكثر هو اللي يعرف ينتصر فيها

لازم نفهم ديننا يا جماعة ، لازم نفهم مواطن العظمة بتاعة ديننا عشان ماحدش يعرف ينفذ لنا ، عشان نقدر نحصن الشباب ، عشان كدة من أهم فوايد دراسة القرآن أن والله العظيم لو جولك بعد كدة مليون واحد يثيروا ليك شُّبُهَات ضد القرآن ، تقولهم روحوا العبوا بعيد ليه ؟ أنا خلاص شُفت في كتاب الله اللي يؤكد إن هذا الكتاب من عند الله ، فطول ما احنا مرتبطين بالقرآن احنا مُحصنين ضد أى حرب ، أى حرب جدلية أو أى حرب شُّبُهَات ، يبقى حرب شُّبُهَات بعد كدة حرب السيف بتاعة أحد

بعد كدة شوط تاني حرب شُّبُهَات قبل الخاتمة ليه ؟ هوا ده اللي أمريكا عملته معنا أمريكا عملت معنا إيه ؟ وأوروبا طبعاً والغرب عمل معنا إيه ؟ بقاهم ١٠٠ سنة قاعدين يجاربونا حرب فكرية اللي هي معنى الإستشراق والعلمانية ويجندوا بعثات من عندنا ليهم بره يقعدوا يسمموهم دماغهم ، وبعد كدة يرجعوهم عندنا هنا عشان يبقوا رعوس فكرية ورموز فكرية عندنا تقعد تسمم دماغ الشباب ، يبقى قاعدين بقاهم ١٠٠ سنة حرب فكرية ، بعد كده يضربوا العراق ويضربوا أفغانستان ويحتلوا فلسطين ليه ؟ حرب السيف ، ما خلاص العقيدة راحت ، ادخل اضرب

### بعد حرب السيف

شايف الذكاء بتاعهم ، بعد حرب السيف ما تخلص المعركة ، لأ دي لازم حرب فكرية تانية ، وهما بيغفروا خالص تقضى عليهم خالص اللي هي أمريكا بتعملها دلوقتي في صورة إيه ؟ كتاب الفرقان اللي هي بتزله ، وفي صورة حرب الشُّبُهَات اللي عاملها على الإسلام ، يعني ربنا في آل عمران يقولنا بالظبط الناس دي بتحاربنا إزاي وبيقولنا بالظبط الناس دي بتفكر إزاي ، وبيقولنا بالظبط احنا نتعامل معاهم إزاي ، ما هي دي رسائل ربنا لنا عشان نعرف نواجه هذا الواقع مش عايزين نطول في الكلام ده ، عايزين ندخل يا جماعة في الشوط اللي احنا هنسمع يعني معظم صلاة التراويح الليلة هتبقى فيه إن شاء الله

## إدارة معركة الشبهات

اللى هو شوط الجدل ، اللى هو إدارة معركة الشُّبُهَات ، اللى هو إدارة معركة الجدل ، من أول قول الله سبحانه وتعالى " **إِنَّ الدِّينَ عِنْدَ اللَّهِ الْإِسْلَامُ** " آل عمران : ١٩ خدوا بالكوا من الحنة دى لأن أنا شخصياً بسبب عدم فهى للنقطة دى راح منى قبل كدة حوالى سنة كدة يعنى سنة من عمرى بسبب إن أنا مافهمتش فقه القرآن فى التعامل مع هذه المعركة أزاى ؟ هنقولوا " **إِنَّ الدِّينَ عِنْدَ اللَّهِ الْإِسْلَامُ** " آل عمران : ١٩ لغاية " **قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ** " آل عمران : ٣١ شوط صغير كدة ، فى الأول عبارة عن الجدل مع اليهود ، ده اليهود دول الجدل معاهم خد جزء كامل فى سورة البقرة ، هو القرآن بينجح فى أهدافه ، يعنى اليهود فى سورة البقرة قاعدين يجعجعوا ، سورة البقرة قضت عليهم ، صوتم خفض فبقوا مش محتاجين غير صفحتين بس جلال ، دلالة على أن القرآن بينجح فى أهدافه بس بتظهر مشاكل جديدة اللى هى ظهرت فى آل عمران مشكلة النصارى فى شوط اليهود ، ربنا ركز على حاجتين يا جماعة ، ركز على جرميتين لليهود :

## الجريمة الأولى

" **إِنَّ الدِّينَ يَكْفُرُونَ بِآيَاتِ اللَّهِ وَيَقْتُلُونَ النَّبِيِّنَ بِغَيْرِ حَقٍّ وَيَقْتُلُونَ الَّذِينَ يَأْمُرُونَ بِالْقِسْطِ مِنَ النَّاسِ فَبَشِّرْهُمْ بِعَذَابٍ أَلِيمٍ** " آل عمران ٢١ ما عندهم ش ولا ل لأهل الحق ممكن يقتلوا النبى ، ممكن يقتلوا الداعية اللى طالع يقولهم اتقوا الله ، مافيش ولا ل لأهل الحق ، بل الولاء بتاعهم لأهل الباطل أو اللى معاه ، يبقى أول صفة إن ما عندهم ش ولا ل وبراء بل كفروا بالله سبحانه وتعالى

## الصفة الثانية

" **أَلَمْ تَرَ " آل عمران : ٢٣ أنت ما شفتش الحاجة العجيبة دى " أَلَمْ تَرَ إِلَى الَّذِينَ أُوتُوا نَصِيحًا مِنَ الْكِتَابِ يُدْعَوْنَ إِلَى كِتَابِ اللَّهِ لِيَحْكُمَ بَيْنَهُمْ ثُمَّ يَتَوَلَّى فَرِيقٌ مِنْهُمْ وَهُمْ مُعْرِضُونَ " آل عمران : ٢٣ ليه إن شاء الله ؟ " ذَلِكَ بِأَنَّهُمْ قَالُوا لَنْ نَمَسَّنَا النَّارَ إِلَّا أَيَّامًا مَعْدُودَاتٍ وَغَرَّهُمْ فِي دِينِهِمْ مَا كَانُوا يَفْتَرُونَ " آل عمران : ٢٤ انتوا عارفين يا جماعة يعنى إيه ؟ " **وَعَرَّهْمُ فِي دِينِهِمْ مَا كَانُوا يَفْتَرُونَ** "**

عارفين النكتة اللى كنا بنسمعها زمان عن جحا لما جحا يعنى دخل مكان كدة ، ففى ناس كثير زحمة فعايز يفرق الناس عشان المكان يفضى له ، قاهم الحقوا قالوا له إيه ؟ قاهم ده الشارع اللى ورانا ده فى واحد بيوزع فلوس ورا ، فالناس قالوا له آه ، فكل الناس طلعت تجرى على الفلوس ، فجحا أما لقي نفسه لوحده آم قايل كل الناس دى أحسن يكون الناس دى كلها صح ، مش معقول أنا ال ، لحسن يكون فعلاً فيه واحد بيوزع فلوس فى الشارع اللى ورانا ، وقام رايح هو كمان يجرى لحسن بيكون فيه واحد بيوزع ، يعنى هو اللى افتراها وبعد كدة هو اللى إيه ؟ هو اللى شربها

أهى دى " **وَعَرَّهْمُ فِي دِينِهِمْ مَا كَانُوا يَفْتَرُونَ** " قاعدين يفتروا على ربنا ويقولوا " **لَنْ نَمَسَّنَا النَّارَ إِلَّا أَيَّامًا**

**مَعْدُودَاتٍ** " قاعدين يجرفوا فى دينهم ، وفى الآخر الحاجات اللى حرفوها هيا دى اللى يقعدوا يقولوا احنا منتظمين بيها لأن ربنا وعدنا وقالنا إن أنتوا من أهل الجنة ، يا بنى ده انتوا اللى ألفتوا الكلام ده أصلاً فى دينكم



يبقى إذا " وَعَرَّهْمُ فِي دِينِهِمْ مَا كَانُوا يَفْتَرُونَ " آل عمران : ٢٤ دي سخرية واستهزاء من الله سبحانه وتعالى بهم " أَلَمْ تَرَ إِلَى الَّذِينَ أُوتُوا نَصِيبًا مِّنَ الْكِتَابِ يُدْعَوْنَ إِلَى كِتَابِ اللَّهِ لِيَحْكُمَ بَيْنَهُمْ ثُمَّ يَتَوَلَّى فَرِيقٌ مِّنْهُمْ "

آل عمران : ٢٣ ده عدم الاتباع يعنى ما يسمعوش كلام الله ، يبقى إذا عدم الولاء والبراء وعدم الاتباع الولاء لله والتبرأ من الكافرين

عشان كدة ربنا فى نهاية هذا الشوط "جدال اليهود" أمرنا بالأمرين دول " لَا يَتَّخِذِ الْمُؤْمِنُونَ الْكَافِرِينَ أَوْلِيَاءَ مِنْ دُونِ الْمُؤْمِنِينَ " آل عمران ٢٨ اوعى تقف فى وجه مع مثلاً أمريكا ضد دولة إسلامية ، اوعى زى الجنود اللى كانوا بيحاربوا فى الجيش الأمريكانى ، جنود مسلمين فلما راحوا يحاربوا فى أفغانستان راحوا يحاربوا معاهم ، فبعيتين فتوى يقولوا يجوز إن احنا نحارب مع أمريكا ضد المسلمين من باب إن احنا بندافع عن وطننا ، طبعاً حكم الله فى هؤلاء أنهم كفرة بالله ، كفرة بكتاب الله ، كفرة برسول الله صلى الله عليه وسلم ، وفى هذا حديث فى صحيح البخارى

فإذا يا جماعة إذا الولاء والبراء ده دينك اوعى توالى أعداء الله ، يجب أن تتبرأ من أعداء الله قولاً وفعلاً ، بل تتبرأ من أهل المعصية ، يعنى لو أصحابي بيعصوا ربنا ما ينفعش أمشى معاهم ؟ تمشى معاهم عشان تدعوهم ، إنما فى غضبك لله ؟ دى أنا بجهم ، طب يا أخى حب الله فى قلبك مش أكثر ، طب هما لهم فضل عليا وبيخدموني ، يا أخى هو منة الله عليك مش أعلى وأظهر ؟ إزاي يا أخى ؟ يبقى إذا يجب أن يكون ولاءك لله وبراءك من كل من خالف الله سبحانه وتعالى

### جدال اليهود... جدال النصارى

الأمر الثانى " قُلْ إِنْ كُنْتُمْ تُحِبُّونَ اللَّهَ فَاتَّبِعُونِي " آل عمران ٣١ الإلتباع كأن ربنا يقول اليهود ما عندهم مش ولاء وبراء وما عندهم مش اتباع ، انتوا عندكوا ولاء وبراء ويبقى عندكوا اتباع " قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ وَيَغْفِرْ لَكُمْ ذُنُوبَكُمْ " آل عمران ٣١ دى جدال اليهود يا جماعة ، جدال النصارى ده الموضوع اللى احنا عاوزين نفهمه ، يعنى كان جالى فترة قبل كدة بدأت أدرس مقارنة الأديان عشان يعنى نبدأ نرد على النصارى ونبدأ ، قعدت فيها فترة طويلة وكان أيامها الواحد لسه ما بدأش يهتم بالقرآن ، لما بعدها بدأت أتجه للتفسير بدأت أفاجأ أن يعنى سبحان ربي كل الحاجات اللى الواحد كان بيضيع فيها وقت طويل جداً موجودة فى القرآن الكريم واحنا مش واخذين بالناس

يعنى من الحاجات اللى كان الواحد طائر بيها إن الديانة النصرانية العقيدة بتاعتها كلها ، اكتشفوا بعد قيام علم مقارنة الأديان إن العقيدة بتاعت البوذيين والسيخ والهندوس ، اللى هى قبل النصارى بألف سنة وأكثر العقيدة بتاعت الأتنيين نسخة من بعض يعنى مسروق جمل كدة من كتب الهندوس مخطوطة فى الإنجيل ، فكان ده من الأسباب الأساسية اللى خلت أوروبا تكفر بالله جميعاً فى أول القرن ده ، ونشأ علم مقارنة الأديان واكتشفوا أن معظم العقائد اللى موجود فى الكتاب المقدس مسروقة من الأديان السابقة فبدأت الناس تخرج من النصرانية فكانت طبعاً معلومة خطيرة جداً بالنسبة للواحد ، فوجئت وأنا بقراً سورة التوبة بقول الله سبحانه وتعالى " وَقَالَتِ الْيَهُودُ عِزِّيُّرُ بْنُ اللَّهِ وَقَالَتِ النَّصَارَى الْمَسِيحُ ابْنُ اللَّهِ ذَلِكَ قَوْلُهُمْ بِأَفْوَاهِهِمْ يُضَاهَهُونَ قَوْلَ الَّذِينَ كَفَرُوا مِنْ قَبْلُ " التوبة

٣٠ طب ماهيا موجودة في القرآن وموجودة في آخر سورة المائدة " **وَلَا تَتَّبِعُوا أَهْوَاءَ قَوْمٍ قَدْ ضَلُّوا مِنْ قَبْلُ وَأَضَلُّوا كَثِيرًا وَضَلُّوا عَنْ سَوَاءِ السَّبِيلِ** " المائدة ٧٧ يا رب المعلومة ، الكلام موجود عندنا في القرآن ، طب واحنا بنشتت نفسنا ليه ؟ لو فهمنا القرآن هنفهم نرد عليهم إزاي

تاني حاجة يا جماعة انك تلاقي غالب أساتذة مقارنة الأديان في الجامعات المصرية وجامعات الأزهر كل قضيته لما يقعد مع واحد غير مسلم انه يقعد يشتمله في الكتاب المقدس ويطلع له الأخطاء بتاعته ، ويقعد يشتمله في التناقضات والأخطاء العلمية غلط يا جماعة غلط ، آل عمران بتقولنا الأسلوب ده غلط ، والأسلوب ده ما بيدخلش حد في الإسلام ، إمال أيه ؟ شوف

**جدال النصارى أربع أشواط**

**الشوط الأول ... أصل القصة الصحيح**

" **إِنَّ اللَّهَ اصْطَفَى آدَمَ وَنُوحًا وَآلَ إِبْرَاهِيمَ وَآلَ عِمْرَانَ عَلَى الْعَالَمِينَ \* ذُرِّيَّةً بَعْضُهَا مِنْ بَعْضٍ** " آل عمران ٣٣: ٣٤ مين آل عمران دول ؟ ده آل عمران اللي هوا عمران ، ده اللي امرأته امرأة عمران ، مين يعني امرأة عمران ؟ امرأة عمران دي اللي لما حملت نذرت لله اللي في بطنها محرر ، مين اللي في بطنها ده ؟ دي اللي في بطنها طلع أنثى مش ذكر طلعت مين ؟ "**وَإِنِّي سَمَّيْتُهَا مَرْيَمَ** " آل عمران : ٣٦ بدأنا نفهم احنا فين ، ده احنا دلوقتي بدأنا ، ده احنا بنجيب القصة من الأول خالص ، من الأول خالص من الجذور

بعد كدة جت مريم والسورة بتكلمنا عن التنشأة الإيمانية الربانية اللي نشأة فيها مريم ، لدرجة إن كان بيتزل عليها رزق الشتاء في الصيف ورزق الصيف في الشتاء ، بعد كدة مريم بتكبر يا جماعة وصورة جانيبة لسيدنا زكريا لما بيشف الكرامات اللي ربنا اعطاها لمريم ، وهو يقول يا رب ولد ، يا رب اديني ذرية طيبة ، وربنا بيديلوه سيدنا يحيى ، بعد كدة نستأنف تاني قصة مريم "**وَإِذْ قَالَتِ الْمَلَائِكَةُ يَا مَرْيَمُ إِنَّ اللَّهَ اصْطَفَاكِ وَطَهَّرَكِ** " آل عمران : ٤٢ ربنا تقبل عبادتها ، تقبل جهدها في العبادة واصطفاها على نساء العالمين "**يَا مَرْيَمُ اقْنُتِي لِرَبِّكِ وَاسْجُدِي وَارْكَعِي مَعَ الرَّاكِعِينَ** " آل عمران : ٤٣

لما تطلع في الولاية لازم تزود عبادتك عشان تقترب من الله أكثر ، فالعبادة لا تتوقف أبدا ، الصورة المشرقة السيدة مريم كبرت ، كُفِلت ، بدأت تطلع في العبادة ، اصطفتيت من قبل الله ، الصورة المشرقة دي بعد كدة يحيى الملك ليبيشر السيدة مريم بسيدنا عيسى ، والفرع بتاع السيدة مريم إزاي ده أنا لم يمسنى بشر بعد كدة ربنا بيرزقها سيدنا عيسى ، بيطلع سيدنا عيسى عليه الصلاة والسلام والمعجزات اللي ربنا بينصره بيها إن هو يحيي الموتى ياذن الله ، ويرأ الأكمه والأبرص ياذن الله ، ويُنبأ الناس بما يدخرون في بيوتهم ياذن الله ، ويعمل تمثال طين كدة على شكل طير وينفخ فيه فيكون طير ياذن الله ، ربنا بيحبلك المعجزات بتاعت سيدنا عيسى بعد معجزات سيدنا عيسى بنى إسرائيل وجحودهم إزاي واجهوه ، و إزاي الحواريين يعني منهم اللي نصره ومنهم اللي تحاذل عنه ، وبعد كدة ربنا رفعه سبحانه وتعالى وأنقذه من الصلب على يد اليهود والرومان ثم يختم هذا الشوط بقول الله "**ذَلِكَ نَتْلُوهُ عَلَيْكَ مِنَ الْآيَاتِ وَالذِّكْرِ الْحَكِيمِ \* إِنَّ مَثَلَ عِيسَى عِنْدَ اللَّهِ كَمَثَلِ آدَمَ خَلَقَهُ مِنْ تُرَابٍ ثُمَّ قَالَ لَهُ كُنْ فَيَكُونُ \* الْحَقُّ مِنْ رَبِّكَ فَلَا تَكُنْ مِنَ الْمُمْتَرِينَ** " آل عمران ٥٨ : ٦٠ إيه اللي حصل ده ؟ أنا

عايز واحد كدة يقولى إيه اللي حصل ده ؟ أنا متوقع إن أنا لو هجادل النصارى يعنى أنا قبل ، قبل ما الواحد يفهم الآيات دى أنا لو هجادل النصارى مش هعمل الكلام ده ، أنا لو هجادل النصارى هقولهم تعالوا انتوا عندكوا ١٥٠ خطأ علمى فى الكتاب المقدس واحد : كذا ، اتنين : كذا ، تانى حاجة انتوا عندكوا ١٥٠ تناقض فى الكلام ، تالت حاجة انتوا عندكوا بشارات فى التوراة والإنجيل فى سيدنا محمد ، رابع حاجة إنتوا عندكوا ، ربنا ماعملش كدة يا جماعة ، أول حاجة قال القصة من جذورها خالص طب ليه ؟ هنقول إحنا مع بعض

### الشوط الثانى...المباهلة

تانى محور فى جدال النصارى وهدم عقيدتهم " **فَمَنْ حَاجَّكَ فِيهِ مِنْ بَعْدِ مَا جَاءَكَ مِنَ الْعِلْمِ فَقُلْ تَعَالَوْا نَدْعُ أَبْنَاءَنَا وَأَبْنَاءَكُمْ** " آل عمران: ٦١ الأطفال الصغيرين " **وَنِسَاءَنَا وَنِسَاءَكُمْ وَأَنْفُسَنَا وَأَنْفُسَكُمْ** " آل عمران : ٦١ كلنا فى ناحية أهو ، وإنتوا فى ناحية " **ثُمَّ نَبْتَهِلُ فَنَجْعَلُ لَعْنَةَ اللَّهِ عَلَى الْكَاذِبِينَ** " آل عمران : ٦١ يعنى إيه ؟ يعنى كل واحد يقف قدام التانى يقول يا رب لو أنا اللي على الباطل العنى ، واعمل فىا وسوى فىا واخسف بيا الأرض والتانى يقول نفس الكلام ، إيه ده ؟ أيه المباهلة دى ؟ اسمها المباهلة يا جماعة ، المباهلة دى ، عايزة واحد يقينه زى الجبل ، تخيل لو إن أنا قولتلك دلوقتى قوم واقف فى المسجد و قول يا رب أنا لو مش على الحق العنى واخسف بيا الأرض ، حاجة فظيعة يعنى ، حاجة عايزة واحد موقن يقين راسخ إن هو على الحق ، المباهلة دى سلاح خطير

يعنى أحد علماء المسلمين لما إحدى الفئات الضالة اسمها القاديانية ، يعنى قعدوا يفتروا على الإسلام فى هذا العصر دعا رسمياً فى الجرائد زعيم الطائفة القاديانية إلى المباهلة ، اللي هو انا وانت ، اللي هو الكلام اللي بنقولوا ده ، دعا إلى المباهلة و كان هذا ، مباهلة إيه ؟ هو عارف إن هو نصاب أصلاً فطبعاً ما استجابش ، كان هذا الأمر سبب فى أن دخل فى الإسلام وتاب إلى الله ، تانى شخصية ! تانى أهم شخصية فى القاديانية على مستوى العالم ، لأن هو الراجل صدم إزاي ما.. ما.. اكتشف إن هو نصاب ، يعنى فىا جماعة لازم المباهلة دي بتخليهم يحسوا احنا موقنين بالحق بتاعنا قد إيه ، آه تعالى باهلنى ، أنا مش خايف من حاجة ، أنا موقن إن أنا الحق أنا موقن

شوف ربنا بيقول بعدها " **ثُمَّ نَبْتَهِلُ فَنَجْعَلُ لَعْنَةَ اللَّهِ عَلَى الْكَاذِبِينَ** " آل عمران : ٦١ شوف إن ، شوف كام مؤكد جه فى الآية " **إِنَّ هَذَا لَهُوَ الْقَصَصُ الْحَقُّ وَمَا مِنْ إِلَهٍ إِلَّا اللَّهُ وَإِنَّ اللَّهَ لَهُوَ الْعَزِيزُ الْحَكِيمُ** " آل عمران ٦٢ " **إِنَّ هَذَا لَ الْلَامِ بِنَاعَتِ التَّوَكِيدِ أَوْ الْقَسَمِ ، "هُوَ" دى للتوكيد ، "الْقَصَصُ الْحَقُّ" التوكيد بالألف واللام يبقى أربعة " وَمَا مِنْ إِلَهٍ إِلَّا " الحصر والقصر ، يبقى توكيد أهو خامس " وَمَا مِنْ إِلَهٍ إِلَّا اللَّهُ وَإِنَّ اللَّهَ لَهُوَ الْعَزِيزُ الْحَكِيمُ "** آل عمران: ٦٢

عشر مؤكدات بلاغية فى آية واحدة ليه ؟ هو ده أهل الحق يا جماعة ، أهل الحق واثق فى اللي هو عليه ، أهل الحق ده لو جابوله مين ، لا يمكن ، يعنى لو واحد جيه قالك أنا هقولك شبهات ضد وجود الله ، وجود الله مين يا بنى أنت مجنون ؟ ده أنت لو جبته الستة مليار واحد اللي على وجه الكرة الأرضية كفروا بالله أنا يقينى بالله لا يتزعزع ولو هتكت الحُجُب ما زدت يقيناً حينما أرى ربي ، آه والله يا جماعة ، دى قضية بديهيه زى الشمس فى وسط السما كده " **وَإِنَّا أَوْ إِيَّاكُمْ لَعَلَى هُدًى أَوْ فِي ضَلَالٍ مُبِينٍ** " سبأ : ٢٤ " **فِي ضَلَالٍ** " عدت إنما " **لَعَلَى هُدًى** " مع

الهدى ، مع الهدى جت لام التوكيد والقسم ، أنا موقن إن أنا على الحق ، فأصل الاعتقاد في الحق اليقين ، و فأصل الاعتقاد في الباطل الشك ، يعني خد بالك لو جيت تقف مع واحد غير مسلم في أى يوم في حياتك ، ابقن إن هو مهزوز من جوه ، وإنه شاكك من جوه ، وإنك انت يقينك بدينك خمسين ألف مرة قد يقينه بدينه ، خدوا بالكوا من هذا الكلام يا جماعة ، ده كلام عن تجارب كثيرة جداً يعنى من القرآن ومن الواقع ، يبقى إذا بعد كدة المباهلة دى الشوط التاني

### الشوط الثالث ... حوار الأديان

" قُلْ يَا أَهْلَ الْكِتَابِ تَعَالَوْا " آل عمران: ٦٤ اطلعوا " تَعَالَوْا إِلَى كَلِمَةٍ سَوَاءٍ بَيْنَنَا وَبَيْنَكُمْ " آل عمران : ٦٤ حوار أديان ،أهو القرآن يقول بحوار الأديان ، بس حوار أديان مش بالمنظر اللي بيتعمل دلوقتي ، ده منظر تاني " تَعَالَوْا إِلَى كَلِمَةٍ سَوَاءٍ بَيْنَنَا وَبَيْنَكُمْ " (آل عمران ٦٤) تعالوا نتفق ، هنتفق على إيه ؟

١. " أَلَا نَعْبُدُ إِلَّا اللَّهَ " (آل عمران ٦٤) هي دى فيها اختلاف ؟

٢. " وَلَا نُشْرِكُ بِهِ شَيْئًا " (آل عمران ٦٤)

٣. " وَلَا يَتَّخِذُ بَعْضُنَا بَعْضًا أَرْبَابًا مِنْ دُونِ اللَّهِ " آل عمران : ٦٤ مش واحد يقعدلى على كرسي الاعتراف ، ويجي قدامه واحد تاني رجل دين ، ويقوله أنا أذنبت في كذا وكذا وكذا اغفرلى ، اغفر لى إيه ؟!

" وَلَا يَتَّخِذُ بَعْضُنَا بَعْضًا أَرْبَابًا مِنْ دُونِ اللَّهِ " ما نعطيش ما لله لبشر ، زى ما هما بيعملوا مع رجال الأديان بتوعهم ، يعطوا ما لا يجوز إلا لله للبشر ، ويفتروا على الله بيؤهوا رجال الدين بتوعهم " وَلَا يَتَّخِذُ بَعْضُنَا بَعْضًا أَرْبَابًا مِنْ دُونِ اللَّهِ " حوار الأديان الإتفاق على مبادئ الوحداية الأساسية

### الشوط الرابع والأخير ...مقارنة الأديان

من أول قول الله سبحانه وتعالى " وَدَّتْ طَائِفَةٌ مِنْ أَهْلِ الْكِتَابِ لَوْ يُضِلُّوكُمْ وَمَا يُضِلُّونَ إِلَّا أَنْفُسَهُمْ وَمَا يَشْعُرُونَ " آل عمران : ٦٩ الشوط الرابع يا جماعة اللي هو فضحهم ، اللي هو مقارنة الأديان ، دى بعد تلت أشواط مقارنة الأديان ، الشوط الرابع اللي هو ربنا بيفضحهم ، بيفضح خبيثتهم ناحيتنا " وَقَالَتْ طَائِفَةٌ مِنْ أَهْلِ الْكِتَابِ آمَنُوا بِالَّذِي أُنزِلَ عَلَى الَّذِينَ آمَنُوا وَجَهَ النَّهَارِ وَكَفَرُوا آخِرَهُ لَعَلَّهُمْ يَرْجِعُونَ " آل عمران: ٧٢ يعنى إيه ؟

يعنى يجي واحد كدة منهم يجي الصبح أنا عرفت إن الإسلام هو الحق ، وأنا قررت إن أنا أسلم والله ، ونفرح بيه ونظير بيه ويقوم جاي بالليل يقول أنا ارتديت تاني والعياذ بالله ، البعيد ارتد تاني ليه ؟ اكتشفت إن الدين بتاعهم وحش ، يقوم يهز المسلمين ، يعنى شوفوا بيخططوا ضدنا أد إيه ! ربنا بيفضح تخطيطهم ثم ربنا ، هنا حملة صارخة عليهم وعلى رجال الدين بتوعهم

" وَمِنْ أَهْلِ الْكِتَابِ مَنْ إِنْ تَأْمَنَهُ بِقِنطَارٍ يُؤَدُّهُ إِلَيْكَ " آل عمران: ٧٥ الإنصاف بتاع الإسلام " وَمِنْهُمْ مَنْ إِنْ تَأْمَنَهُ بِدِينَارٍ لَّا يُؤَدُّهُ إِلَيْكَ إِلَّا مَا دُمْتَ عَلَيْهِ قَائِمًا " آل عمران : ٧٥ حب الدنيا اللي عندهم ، السرقة والإستغلال والجور على حقوق الناس

"وَإِنَّ مِنْهُمْ لَفَرِيقًا يَلُؤُونَ أَلْسِنَتَهُم بِالْكِتَابِ" آل عمران : ٧٨ يقعد كدة يعمل بصوته كدة ، زى ما إحنا بنعمل بصوتنا مثلاً و إحنا بنقرأ القرآن ، قال يعنى لما تسمع الكلام ده تقول دى كلام من عند الله " وَمَا هُوَ مِنَ الْكِتَابِ " آل عمران : ٧٨

"وَإِنَّ مِنْهُمْ لَفَرِيقًا يَلُؤُونَ أَلْسِنَتَهُم بِالْكِتَابِ لِتَحْسَبُوهُ مِنَ الْكِتَابِ وَمَا هُوَ مِنَ الْكِتَابِ وَيَقُولُونَ هُوَ مِنْ عِنْدِ اللَّهِ وَمَا هُوَ مِنَ عِنْدِ اللَّهِ" آل عمران : ٧٨ هنا ربنا بيذكرنا بالتناقضات اللى فى التوراة والإنجيل ، والأخطاء العلمية اللى من أول صفحة هنا وهنا بتلاقيها ، مقارنة الأديان ، هدم الدين بتاعهم " وَمَا هُوَ مِنَ عِنْدِ اللَّهِ وَيَقُولُونَ عَلَى اللَّهِ الْكَذِبَ وَهُمْ يَعْلَمُونَ " آل عمران : ٧٨

ثم نأتى إلى قول الله سبحانه وتعالى " وَإِذْ أَخَذَ اللَّهُ مِيثَاقَ النَّبِيِّينَ لَمَا آتَيْتُكُمْ مِنْ كِتَابٍ وَحِكْمَةٍ ثُمَّ جَاءَكُمْ رَسُولٌ مُصَدِّقٌ لِمَا مَعَكُمْ لَتُؤْمِنُنَّ بِهِ وَلَتَنْصُرُنَّهُ " آل عمران : ٨١ البشارات بسيدنا محمد فى التوراة والإنجيل ، فى التوراة جملة كدة " النبي الذى أقبل من فاران " اللى هى مكة " ومعه عشرة آلاف قديس " تصوير فتح مكة موجود فى التوراة ، بل اسم رسول الله صلى الله عليه وسلم بالإسم موجود فى الإنجيل ، بالحرف موجود كلمة برقليطس للى فى كتب مقارنة الأديان بالحرف معناها كلمة أحمد

بل اسم أحمد موجود فى التوراة بالحرف ولم يُحرف حتى الآن اسمه موجود بالتوراة بالحرف ، اللى بيقرأ فى الكتب بتاعت مقارنة الأديان بيلاقى الكلام ده بالظبط ، بشارات وراء بشارات ، بشارات وراء بشارات ، فرنا بيقلنا هنا كلموهم عن بشارات التوراة والإنجيل كلموهم ، مقارنة الأديان يا جماعة ، حتى ينتهى هذا الشوط بقول الله سبحانه وتعالى " يَا أَهْلَ الْكِتَابِ لِمَ تَكْفُرُونَ بِآيَاتِ اللَّهِ وَاللَّهُ شَهِيدٌ عَلَىٰ مَا تَعْمَلُونَ \* يَا أَهْلَ الْكِتَابِ لِمَ تَصُدُّونَ عَنْ سَبِيلِ اللَّهِ مَنْ آمَنَ تَبْغُونَهَا عِوَجًا وَأَنْتُمْ شُهَدَاءُ وَمَا اللَّهُ بِعَاقِلٍ عَمَّا تَعْمَلُونَ " آل عمران : ٩٨ : ٩٩

### عقيدة النصارى !!!

إيه الحكمة بتاعت الأربع أشواط دول ؟ أول حاجة ذكر القصة من الأصل ، اللى هو قبل ما أبطل الباطل أظهر الحق يا جماعة ، قبل ما أكلم الناس دى عن الأخطاء اللى فى دينهم ، أكلمهم عن العظمة اللى فى دينى الأول ، لما نروح للناس دى ونقولها القصة الجميلة المشرفة دى ، وبعد كدة نقولها بقى إنتوا تصدقوا القصة دى ولا تصدقوا إن مش عارف سيدنا آدم غلط ، وربنا غضب على البشر عشان خطيئة واحد هما ما همش دعوة بيه أصلاً !!! يعنى واحد أخطأ إنت مالك ؟؟ حتى لو أبويا أخطأ أنا مالى ؟؟؟ " لَا تَزِرُ وَازِرَةٌ وِزْرَ أُخْرَى " الإسراء : ١٥ فرنا بسبب غضبه على البشر جه بعد كدة قام منزل ابنه عشان ابنه يتصلب ويتهدل عشان يغفر خطيئة البشر !!! يعنى ذنب انت ما أذنبتوش وقام جاي واحد برضه إنت مالکش دعوة به ، أنا مالى أصلاً دى قصة أنا ماليش دعوة بيها خالص ، وبعد كدة مات تلت أيام !!! والكون كان من غير إله تلت أيام !!! وبعد كدة ربنا بعد تلت أيام صحى وما عرفش إيه !!! التليخ ده إيه ده ؟!!!



**تكلم عن دينك مع غير المسلمين**

بالله عليك لما تتعرض القصة دي ، القصة دي ولا دي ؟ يبقى يا جماعة أول خطوة لهدم الباطل إظهار الحق ، قبل ما نتكلم عن دينهم نتكلم عن ديننا يا جماعة ، وهنتكلم عن ديننا إزاي إلا لو فاهمينه ، يبقى لو وقفت مرة مع أى حد من غير المسلمين :

**١. اعرضوا القرآن الأول :**

كلمه عن القرآن الأول ، كلمه عن القرآن بيتكلم عن ربنا إزاي وبيتكلم عن الرسل إزاي ، وإزاي إن القرآن مليون أخلاقيات ومليان مبادئ ومليان إعجاز وو ، يبقى نتكلم عن الحق

**٢. ثم المباهلة :**

بعد ما عرضت الحق ، عرضت مدى ثقفتي في الحق ، في أحداث ١١ سبتمبر قالوا إن ألوف مؤلفة في أمريكا دخلوا في الإسلام عارفين ليه ؟ إنتوا عارفين ليه ؟ هو العمل أصلاً يعني ما حدش يدخل في دين بسبب إن عمل حاجة زى دي ، إنتوا عارفين ليه ؟ الناس مش قادرة تصدق إن في واحد عنده يقين بعقيدته لدرجة أنه يفجر نفسه عشان دينه ، عشان كدة العمليات بتاعت فلسطين بتزلزل الناس دي ، إيه الدين اللي يخلى واحد يلغم نفسه ويقطع نفسه مليون حطة عشان دينه

الحاجات دي يا جماعة بتزلزل قلوبهم ، لأن الدين الإسلامى هو الدين الوحيد اللي بيزرع يقين لا حدود له في قلب متبعه ، لأنه دين ربنا كله نور على نور ، فبتلاقى نفسك عندك يقين ١٠٠% ، فالمباهلة دي وما على أمثالها لازم نوصل للناس دي إحنا موقنين بديننا قد آيه ، إنما لما يشوفوا الجامعة دلوقتي موقنين بإيه ؟ دين إيه ده ، دي الناس دي يعني واضح إن هما أصلاً شاكين في دينهم ، مش مصدقين دينهم

**٣. حوار الأديان :**

نقف مع بعض كدة عشان نورى الناس التسامح بتاعنا ، ونورى الناس المبادئ الجميلة بتاعتنا ، ونتناظر كدة قدام الناس كلها ونوصلهم مبادئ الإسلام

**٤. مقارنة الأديان :**

ثم آخر حاجة يُهدم بيها هذه الأديان مقارنة الأديان ، تعالوا أما أقولكوا الأخطاء العلمية اللي عندكوا ، اللي هي هدم الباطل ، بعد احقاق الحق إبطال الباطل ، تعالوا أما أقولكوا الأخطاء العلمية اللي عندكوا والإعجاز العلمى اللي عندى ، تعالوا أما أقولكوا البشارات اللي عندكوا بسيدنا محمد في التوراة والأنجيل ، بل في الكتب اللي قبلها كمان ، العقاد له كتاب جايب فيه بشارات بسيدنا محمد في كتب الهندوس ، في كتب بتتوع الهند والصين ، سبحان ربى ، كأنها كانت كتب فعلاً فيها آثار من التعاليم السماوية

تعالوا أما أجيب لكوا الأقوال اللي في كتبكوا اللي بتؤكد إن سيدنا عيسى بشر وليس غير بشر ، سيدنا عيسى بنفسه في ٥٠٠ جملة في الكتاب المقدس يقول أنا بشر ، ٥٠٠ جملة في كتاب يعنى من الكتب ألفه أحد المسلمين ،

أحد علماء مقارنة الأديان ، تعالوا أما اقلوكوا أفصح خبيثتكموا ضدنا وتعالوا أما أفصح أخلاقياتكموا وتعالوا أما نهدم هذا الدين بنقاط الهدم الموجودة فيه ، وفي كتابه الذين افتروه على الله سبحانه وتعالى

### لنصرة الإسلام

يبقى إذاً الكلام اللي أنا عايز أخرج بيه من ده كله إيه ؟ إن أول خطوه لنصرة الإسلام هو ظهور صورة الإسلام ودى آخر حاجة هنختم عليها بإذن الله في هذا الدرس يا جماعة ، إن أول حاجة لنصرة الدين أن صورة الدين تظهر يا جماعة

يا جماعة آل عمران كلها حرب عشان حاجة واحدة بس ، عشان صورة الدين الرائعة اللي في البقرة دى ما بتظهرش قدام الناس ، اعرفوا الناس دى خايفة من إيه عندنا ، الناس دى خايفة من نموذج الملتزم المتكامل اللي وجهه منير اللي مجتهد في الدين ، اللي أخلاقياته عالية ، اللي فاهم دينه صح ، وفاهم يتكلم عن دينه صح ، وفاهم نقاط الإعجاز في دينه صح ، ده اللي مخوف الناس دى يا جماعة

الناس دى مرعوبة ، عشان كدة الاعلام الغربي كله أول ما يحصل أى حاجة فيها دم ولا حاجة عند المسلمين يقوموا جابونها ، على طول قاعدين يفتروا علينا ، على طول قاعدين يثيروا شُبُهات علينا في الإعلام بتاعهم ليه ؟ عشان يشوهوا صورة الدين الجميلة برة

فإحنا عايزين نظهر صورة ديننا ، عايزين عظمة الإسلام ، الناس دى تعرفها ولو عرفتها كلهم هيدخلوا في الإسلام كلهم لما زمان عظمة الإسلام ظهرت على جيل الصحابة ، لما تفرقوا في نص الأرض في الفتوحات نص الأرض دخلت الإسلام ليه ؟ لإلهم شافوا صورة الدين ، إحنا مش ممثلين لصورة الدين ، إحنا اللي يشوفنا ما يشوفش صورة الدين ، اللي يشوفنا يشوف صورة مشوهة ، صورة مُتميعة ، صورة بالعكس ، صورة معكوسة أو مغلوطة زى اللي برة

إنما صورة الدين اللي لما الناس شافتها زمان ، العالم كله والحضارات كلها والأفكار كلها والأديان كلها ركعت تحت قدمي الإسلام ، وخضعت تحت قدمي الإسلام ، وكله دخل في الإسلام ، يبقى عاوزين نعرف سر قوة ديننا ، إن صورة الدين الحقيقية تظهر ، إن مبادئ الدين بتاعتنا تظهر ، ليس فقط في الكلام ولكن في نماذج عملية اللي هي إحنا ، كل واحد يطلع عليها يرى صورة الدين واضحة ، هذه مسئوليتنا تجاه الإسلام ، وهنكمل بكرة إن شاء الله بإذن الله سورة آل عمران وهنتكلم من خلالها عن آيات غزوة أُحُد اللي هي زى ما قولتلكوا كدة ، يعني ما تمينا وما وددنا أن نتنصر في أُحُد ثم لا تنزل هذه الآيات سبحانك اللهم وبحمدك أشهد ألا إله إلا أنت أستغفرك وأتوب إليك

تم بحمد الله

شاهدوا الدرس للنشر على النت في قسم تفريغ الدروس تفضلوا هنا :

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>